

Sr. Anthony Latham di Aurora Funeral Home:

Nos tin e ekiponan pa cremacion desde November aña pasa



Sr. Anthony Latham di Aurora Funeral Home.



Urna, esaki ta posibel reemplaso pa caha di morto na momento cu ta scoge pa cremacion.



Mashin di cremacion na Aurora Funeral Home.

ORANJESTAD – Auke Parlamento a pasa ley di cremacion diaranson ultimo, Aurora Funeral Home tin su ekiponan pa cremacion desde November aña pasa. “Nos tin full e mashin cla, nos ta gekeur bou DTI (Dienst Technische Inspectie), nos tin full e instalacion di gas caba, e mashin ta getest caba y nos ta wardando Minister keda cla,” esaki ta palabranan expresa pa Sr.

Anthony Latham, Funeral Director di Aurora Funeral Home. Latham ta remarca cu e peticionnan tey y nan a manda 4 cliente Corsou caba pe aña aki caba. Sinembargo e proceso via Corsou tin un costo hopi mas halto mirando cu tin e gastonan di e biahe cu ta bin adicional. Esaki ta haci cu den mayoria caso ta algun miembro di famia so por atende esaki,

pa motibo di e limitacion financiero. Segun Latham, e servicio di cremacion ta bira mas barata cu un entierro normal. “Bo ta cuminsa caba na elimina un santana, santana so caba ta 2 mil florin,” Latham ta bisa.

E ta sigui remarca cu ta e famia ta esun cu ta haci un entierro caro, pero cu e servicio di cremacion e cliente por

scapa sigur un 30-40 porciento.

Latham opina cu esaki ta un bon cos pa Aruba, mirando cu e ta hopi mas higienico y no tin mucho espacio mas den e santananan na Aruba.

“Santana di Sta. Cruz e aña aki ta yena completo, santana na Playa, no tin mas luga. Santana di Noord ta yen kierenen basicamente no tin mucho espacio mas,” Latham ta señala. □